

**Inuussutissarsiutigalugu aalisartut piniartullu pisortanit ikiorserneqarnissamik  
inatsisitigut periarfissaat aammalu kommunemi allaffissornikkut kingunerisassai  
pillugit Naalackersuisut nassuiaanissamik peqquneqarnissaannik Inatsisartut  
aalajaangiiffigisassaattut siunnersuut**

*Inatsisartunut ilaasortamit Doris Jakobsen Jensenimit saqqummiunneqartoq*

**pillugu**

**Ilaqutariinnermut Peqqissutsimullu Ataatsimiititaliap**

**siunnersuutip aappassaaneernejarnissaanut**

**ISUMALIUTISSIISUTAA**

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Anna Wangenheim, Demokraatit, siulittaasup tullia

Inatsisartunut ilaasortaq Doris J. Jensen, Siumut

Inatsisartunut ilaasortaq Dines Mikaelson, Siumut

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Edvard Nielsen Aronsen, Inuit Ataqtigiit, sinniisussaq

Inatsisartunut ilaasortaq Mette Arge-Hammeken, Naleraq

UPA2024-imi 16. april siullermeerinninnerup kingorna siunnersuut ataatsimiititaliap misissorpaa.

**Siunnersuutip imarisaa siunertaalu**

Inuussutissarsiutigalugu aalisartut piniartullu pisortanit ikiorserneqarnissamik periarfissaat pillugu inatsit aamma kommuninut allaffissornikkut kingunerisassai pillugit Naalackersuisut nassuiaasiornissamik peqquneqarnissaat siunnersuuteqartup siunnersuuteqarnermigut anguniarpaa. Inuussutissarsiutigalugu aalisartut piniartullu suliffissarsiortutut imaluunniit suliffeqanngitsutut nalunaarsorneqarnerisa pisortanit ikiorserneqarnissamik periarfissaannut qanoq kinguneqarsinnaanerata, tassungalu ilanngullugu aalisartut inuussutissarsiutigalugu aalisarsinnaanermut aamma inuussutissarsiutigalugu piniarsinnaanermut allagartaminnik

annaasaqarsinnaanerat misissorneqarnissaa qulaajarneqarnissaalu siunnersuummi pingaartinneqarpoq.

### **Siunnersuutip Inatsisartunit siullermeerneqarnera**

Siullermeerinninnermi siammasissumik oqallittoqarpoq aammalu ajornartorsiutip uteqqiattuunera suliassa qarfiullu misissorneqarnissaata pisariaqarnera immikkut pingaartinneqarput.

Naalackersuisut allannguutissatut siunnersuummik imaattumik siullermeerinninnermi saqqummiussipput:

*”Pisortanit ikiorsiissutit pillugit ilitsersuinermut suliniutit pioreersut naliliiffigeqqinnissaannut Naalackersuisut peqquneqassasut”*

Tamanna tunngavigalugu immikkoortoq ataatsimiititaliamit suliarineqartussanngorlugu innersuussutigineqarpoq.

### **Siunnersuutip aningaasatigut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Taamanna naapertorlugu siunnersuutip piviusunngortinneqarnerani aningaasatigut kingunerisassat siunnersuummi oqaatigineqartut ataatsimiititaliamit maluginiarneqarpoq, taamaalillunilu naatsorsuutigineqarpoq misissuinerup ingerlanneqarnissaa 125.000 kr.-inik naleqartumik qaammatinik pingasunik sivilissuseqassasoq naatsorsuutigineqarluni.

### **Ataatsimiititaliap siunnersuummik suliarinninnera**

Siunnersuummi sammineqartut tapersorsorluarneqarnerat ataatsimiititaliamit maluginiarneqarpoq, oqallinnermilu aalisartut piniartullu pisortanit ikiorserneqarnissamik periarfissaat pillugit ajornartorsiutit saqqummiunneqartut akuersaarlugit. Malittarisassat januar 2024-mi atuutilersinneqartut misissorneqarnissaat siusippallaartoq aammalu aalajangiiffigisassatut siunnersuummi allaffissornikkut aningaasatigullu kingunerisassatut naatsorsuutigineqartuniit aningaasartuutit amerlanerunissaat Naalackersuisut erseqqissaatigaat.

Pisortanit ikiorserneqartarneq pillugu inatsimmi ilitsersuinikkut suliniutit pioreersut kommunit pisariaqartitaannik matussusiisuunersut naliliiviginiartinneqarnerisigut Naalackersuisut allannguutissatut siunnersuutaat siunnersuutaqqaartumit allaassutaavoq. Taamaaliornikkut malittarisassat inatsisillu atuuttut kommuninit aqunnissaat pisariinnerulersikkumallugu, taamaaliornikkullu aalisartut piniartullu periarfissaminnik ajornannginnerusumik

ilisimasaqalersinnaaqqullugit.

**Ataatsimiititaliap inassuteqaatai**

Ataatsimiititaliap isumaqatigiittup allannguutissatut siunnersuut imaattoq saqqummiuppaa akuersissutigineqarnissaalu inassutigalugu:

- *“Inuussutissarsiutigalugu aalisartut piniartullu pisortanit ikiorserneqarnissamik inatsisitigut periarfissaat pillugit kommunini ilitersuutit nalilersoqqinneqarnissaannik ersarissarneqarnissaannillu Naalakkersuisut peqquneqarnissaannik Inatsisartut aalajangiiffigisassaattut siunnersuut”*

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

---

Mala Høy Kúko  
Siulittaasoq

---

Anna Wangenheim  
Siulittaasup tullia

---

Doris J. Jensen

---

Dines Mikaelen

---

Mikivsuk Thomassen

---

Edvard Nielsen Aronsen

---

Mette Arqe-Hammeken